

PN Reapresia Ona LFP, Mantein Artigu Ne'ebé TR deside Inkonstitusional

DILI, 8 outubru 2019 (TATOLI)–Parlamentu Nasionál (PN), tersa ne'e, iha sesaun plenária Parlamentu Nasionál, halo ona reapresiasaun ba Dekretu Parlamentu Nasionál nú.9/V- alterasaun daruak Lei nú. 9/2005, 3 agostu, kona-ba Lei Fundu Petrolíferu.

Dekretu hosi Parlamentu Nasionál ne'e aprova iha jeneralidade, espezialidade to'o final global ho votu a-favór 34, kontra 24 no abstensaun 3.

Parlamentu Nasionál halo reapresiasaun ka apresiasaun foun bazeia ba artigu 14 Rejimentu Parlamentu nian, ne'ebé hateten katak Prezidente Parlamentu Nasionál bele hola iniciativa ba ajenda ka deputadu na'in 10 bele halo rekerimentu.

Xefe Bankada FRETILIN, Aniceto Guterres, esplika kuandu Tribunál Rekursu pronúnsia ona inkonstitusionalidade ba nórma hosi diploma ida ne'ebé submete ba apresiasaun, ne'e Prezidente Repúblika tenke veta.

“Iha kazu ne'e, Prezidente Repúblika laiha opsaun ka la livre deside veta ka la veta. Prezidente Repúblika obrigatoriamamente tenke veta ho fundamentu sira ne'ebé konsta duni iha Tribunál ninia akordaun, nune'e remete fali mai iha Parlamentu Nasionál hanesan na'in ba diploma ne'e”, Aniceto hateten liuhosi plenária.

Nia afirma, loloos ne'e, halo de'it reformulasaun nune'e hasai tiha artigu balun ne'ebé Tribunál Rekursu (TR) deklara inkonstitusional. Maioria Bankada FRETILIN hakarak halo reformasaun ba diploma ne'e.

Nune'e mós, Deputada Bankada FRETILIN, Maria Angélica Rangel, kestiona maka'as apresiasaun foun ne'e, tanba la muda buat ida–mantein de'it alterasaun antes ne'e.

Hatán ba kestaun ne'e, Prezidente Parlamentu Nasionál, Arão Noé de Jesus da Costa Amaral, subliña reapresiasaun iha dalan tolu.

“Reapresiasaun ne'e iha dalan tolu. Ida maka konfirmasaun votu. Segundu mak alterasaun no terseiru mak plenária bele konsidera dekreto la prezisa no husik tiha de'it (kaduka)”, dehan Arão Noé liuhosi plenária.

“Ohin opsaun ne'ebé deputadu sira foti apresenta proposta ida mai halo alterasaun ba dekreto número 9 ne'ebé Prezidente Repúblika veta no halo alterasaun depois aprova duni iha final global”, nia haklaken.

Nune'e, textu hosi aprovasaun ne'e deputadu sira baixa ona ba Komisaun C (trata Asuntu Finansa) hodi halo redasaun final.

Bainhira Komisaun C finaliza redasaun final sei relata ba meza Prezidente Parlamentu Nasionál hafoin enkamiña ba Prezidente Repúblika hanesan projetu foun.

Akordaun Tribunál Rekursu deklara inskonstitusionalidade ba LFP ne'ebé ko'alia kona-ba Investimentu Operasaun Petrolífera alínea 1, 2, no 3.

Purtantu, iha parte lorokraik, sei halo debate no aprovasaun ba dekreto apresiasaun foun Dekretu Parlamentu Nasionál nú.10/V-Segunda alterasaun Lei no.13/2005, 2 setembru, kona-ba Lei Atividade Petrolífera (LAP).

Jornalista: Evaristo Soares Martins Editór: Xisto Freitas

Tempu Badak, PN Enkamina LFP no LAP Ba PR Lú Olo



Prezidente Parlamentu Nasionál, Arão Noe de Jesus Amaral. Imajen/António Gonçalves

DILI, 10 setembru 2019 (TATOLI) – Parlamentu Nasionál (PN) iha tempu badak sei enkamiña reapresiasaun foun ba Dekretu Parlamentu Nasionál nú.9/V–segunda alterasaun Lei nú.9/2005, 3 agostu kona-ba Lei Fundu Petrolíferu (LFP) no Dekretu Parlamentu Nasionál nú.10/V–segunda alterasaun Lei nú.13/2013, 2 setembru kona-ba Lei Atividade Petrolífera (LAP).

Prezidente Parlamentu Nasionál (PPN), Arão Noé de Jesus da Costa Amaral, hateten iha possibilidade ohin lorokraik PN bele enkamiña dekretu rua ne'e ba Prezidente Repúblika (PR), Francisco Guterres 'Lú Olo', tanba Komisaun C trata asuntu Finansa Públika no Komisaun D trata asuntu Ekonomia no Dezenvolvimentu konklui ona textu finál iha lora kuarta ne'e.

“Ha'u baixa ba DIPLÉN (Divizaun Apoia Plenáriu) atu prepara textu finál. Orsida reuniaun líder bankada hotu ha'u asina hotu haruka kedas ba Prezidente Repúblika”, tenik Arão Noé ba jornalista sira iha resintu PN, kinta ne'e.

Nia dehan, tuir lei Xefe Estadu iha lora 30 nia-laran hodi foti desizaun veta ka promulga.

“Bainhira lora 20 nia laran maka la haruka ba Tribunál Rekursu, entaun durante lora 30 nia laran Prezidente Repúblika bele promulga ka veta polítik”, nia esplika.

PN halo ona re-apresiasaun ba Dekretu Parlamentu Nasionál rua ne'e hanesan proposta foun iha lora tersa (08/10) no pasa ho votu maioria.

Jornalista: Evaristo Soares Martins Editór: Xisto Freitas